

Aalajangiiffigissassatut siunnersuut, Upernavimmi Uummannamilu, nunaqarfiillu eqqaaniittuni eqqaaveqarneq pillugu Naalakkersuisut nalunaarusiussasut, nalunaarusiaq agguanneqassaaq UKA2023-imi. Nalunaarummi erseqqissarneqarsimassaaq, eqqakkanik isumaginninneq qanoq allatut suliarineqarsinnaansoq, ukiuni arlalippassuarni atasinnaasunik, kiassarnikkut inaallagiaqarnikkullu iluaqutaasinnaasunik sanaartussagaanni, qanorlu aningaasaqarnikkut kinguneqassanersoq.

(Inatsisartunut ilaasortaq Aqqalu C. Jeremiassen, Atassut)

Akissuteqaat

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Aqqalu C. Jeremiassen, Atassut, aalajangiiffigissassatut siunnersuummik saqqummiussaqaqarneranut qutsavigerusuppara. Avannaani eqqagassalerinerup amigarnera pillugu Naalakkersuisunit siunnersuuteqartoq isumaqatigineqarpoq, aammalu pissutsit pitsaanerulersinniarlugit anguniagaqarfiusumik sulisoqarpoq.

Naalakkersuisut eqqagassalerinermi anguniagaat suliniutaallu Naalakkersuisut Eqqagassalerinermut Pilersaarutaanni 2020-2031-mi allaaserineqarput. Naalakkersuisut isumaqarluinnarput, Avannaata Kommunanut ESANI A/S-imut ilaaleqqinnissaq siunissamut ungasissumut aaqqiissutissani pitsaanerpaasoq. ESANI A/S-imut ilaalernermi eqqakkat illoqarfinniit nunaqarfinniillu nuna tamakkerlugu ikuallaavinnut assartuunneqartarnerini aningaasaqarnikkut nammaqatigiiffiusumik aaqqiissuteqarnissaq qulakkeerneqassaaq. Eqqakkat qanorluunniit ungasitsigisumiit ESANI A/S-imut assartorneqaraluarpata akiusut assigiipput. Nuna tamakkerlugu ikuallaaviliornissaq Kalaallit Nunaat tamakkerlugu aaqqiissutissaavoq.

Kommunit ataatsimoorlutik eqqagassalereqatigiiffiat ESANI A/S Sisimiuni Nuummilu eqqakkanik ikuallaavinnik nutaaliaasunik nutaanik marlunnik sanaartortitsileruttorpoq. Ikuallaaviit nutaat 2024-mi piareerpata, eqqakkat kommunini ilaasortaasuni illoqarfinnit nunaqarfinniillu nuna tamakkerlugu ikuallaavinnut nutaanut assartuunneqartassapput. Ikuallaaviit nutaat pilersinneqarnerini nuna tamakkerlugu eqqagassalerinerup pitsaanerungaatsialernissaa qulakkiissavarput.

Avannaani ikuallaaveeqqanik sanaartornissaq aaqqiissutissatut Naalakkersuisunit isigineqanngilaq, ikuallaaviit mikisut ataatsimut isigalugit avatangiisit peqqissuserlu eqqarsaatigalugit isumannaatsumik ingerlanneqarsinnaanngimmata, aammalu avatangiisinut inatsit malinneqarsinnaanngimmat. Ikuallaavinni mikisuni dioxin-imik akoorutinillu ajoqusiisinnaasunik allanik akuersaarneqarsinnaanngitsunik annertussusilinnik aniatitsinissaq annertuumik ulorianartorsiorfiusarpoq.

Kommuni eqqagassanut pilersaarummik, kommunimi eqqagassalerinermut pilersaarusiamik sukumiisumik imalimmik suliaqartussaavoq. Naalakkersuisut naliliinerat malillugu, kommunip eqqagassanut pilersaarusiaani Uummannami Upernavimmilu, taakkulu nunaqarfiini eqqagassat isumagineqarnissaat allaaserineqartussaavoq. Naalakkersuisoqarfinniit tamatigut pisarnitsitut kommuni Naalakkersuisut eqqagassalerinermut pilersaarusiaanni 2020-2031-mi sinaakkusiussat iluanni kommunip eqqagassalerinermut pilersaarusiaata ineriartortinneqarnerani kommuni suleqatigerusunneqarpoq.

Kommunit maanna eqqagassalerinerannut ikiorsiissutissatut ukioq manna avatangiisinut aningaasaateqarfik aqqutigalugu ESANI A/S-imut nuna tamakkerlugu eqqakkanik assartuinissamut 1,4 mio. koruunit neriorsuutigineqarput. Illoqarfinni nunaqarfinnilu eqqakkat katersuuttut ikilisarneqarnissaat siunertaralugu neriorsuuteqartoqarpoq. Kommunit ataasiakkaat namminneerlutik aaqqissuussinermut peqataassanerlutik aalajangigassaraat. Tamatumunnga atatillugu paasissutissiissutigineqarsinnaavoq, Avannaata Kommunia eqqakkanik poortorneqarsimasunik aallertoqarnissaanut neqeroorummot akuersisimammat. Nuna tamakkerlugu ikuallaaviit suli piariingimmata, eqqakkat katersorneqartut assersuutigalugu Danmarkimut suliassanngorlugit nassiunneqassapput.

Tamanna tunngavigalugu siunnersuutip itigartinneqarnissaa Naalakkersuisut inassutigaat.